

四庫全書

史部

欽定四庫全書

蜀中廣記卷五十三

明 曹學佺 撰

蜀郡縣古今通釋第三

上川東道屬

重慶府

管三州十七縣

周巴子國秦使張儀滅巴立巴郡遂城江州二漢因之  
獻帝時巴分為三江州實永寧郡理梁改楚州以地隣

乎楚也隋改渝州以江受渝水也唐天寶之南平郡宋  
崇寧之恭州又因而屢改矣後以光宗潛邸始陞府名  
重慶重慶者以介乎順紹二慶之間也紹慶府為今之  
彭水縣

巴縣

水經注云巴水至江州城下與岷江合也江州實縣名秦  
漢至南齊皆因之永明初移置楚溪口始有巴名

江津縣

地居江之津也南齊移江州縣於熨溪口即此西魏曰江陽後周又增置七門郡改陽為津自隋始

南川縣

唐初割渝州東界置六縣其一也以地枕熨溪南云

長壽縣

長壽山名寰宇記云山下有老人村也縣國初置實秦漢之枳唐之樂溫地矣志云縣東北五十里有樂溫灘即故縣址元立涪陵巡檢司於此



大足縣

唐乾元二年與昌州同置取豐足之義也或云縣之寶頂山有巨人跡

永川縣

亦唐乾元置地枕侯溪水山川濶永故以為名

榮昌縣

乾元間於此立昌州及昌元縣今名洪武四年改介於榮州也府志舊州埧有昌州巡檢司又云榮昌治西

昌元里即唐昌元縣址亦嘗充靜南軍使

### 綦江縣

夜郎之境古綦市也舊隸南平軍明王珍始置今縣國朝因之萬厯二十七年楊應龍叛入其郭踰月乃復此縣舊名賓化屬南平軍元時為綦江長官司

### 壁山縣

寰宇記云界有孤山壁立西北險峻東南削平號為重壁唐至德初置縣於此因以為名

合州 管銅梁定遠二縣

在涪漢二水會合處秦漢及晉之墊江縣也今州西魏始置而墊江之名徙入忠州矣 廢涪陵郡隋大業置志云今州治即隋之涪陵郡蓋與州同理者 廢石鏡縣魏恭帝置志云涪江中有石鏡如月水落時高可三丈有唐人題刻 廢漢初縣隋大業置寰宇云即魏之清居郡也 廢赤水縣隋開皇置寰宇云界有赤水之源也 志曰廢赤水址在州西北百三十里廢漢初址

在州西北百九十里

銅梁縣

蜀都賦外負銅梁唐武后長安三年置縣以界有是山也  
廢巴川縣寰宇云唐開元年割石鏡之南銅梁之  
東置巴川縣以地在巴川為名至元併入銅梁今縣有  
宋時巴川社倉碑

定遠縣

本合州之石鏡縣地宋開禧中增置河溪縣元立武勝

軍行河溪安撫事尋改名定遠言永遠安定矣後改為縣國朝因之

安居縣

周武之柔剛縣也隋改今名屬安居郡以其地可安居矣唐宋屬普州國初併入銅梁成化中復析置廢隆龕縣在縣西二里隆龕山下唐避諱改隆為崇此縣與安岳各有其半乃舊安居云

忠州

管鄧都墊江二縣

二漢之臨江縣梁改為郡兼置臨州矣唐改今名取巴  
蔓子嚴顏之節也樂子正曰地邊巴徼當懷惠而忠信  
矣宋以度宗潛邸陞咸淳府蓋在改元之初云 本志  
治東百里北岨有臨江城元置臨江鎮巡檢司今仍又  
云東南二百里廢龍渠縣宋置元省入

鄧都縣

本巴郡枳地也漢永元二年分枳置平都縣蓋山名云  
改平為豐自隋始豐傍加邑國初始 廢南賓縣唐武

德置以屬南賓郡者郡併忠州而縣併酆都也今縣治前有南賓渡

墊江縣

古墊江今合州是後魏恭帝三年始置於此取漢之舊名也墊下也與昏墊同仰水下流皆得稱之蜀中見者凡三一為合州蜀志先主自墊江入涪是也一為劍州漢書地理志云梓潼江水南流四里至墊江入涪水是也一為今縣縣界有桂溪乃唐桂溪縣址

涪縣

管武隆彭水二縣

集韻涪漚水泡也水出牂柯費州外南至黔江入州本漢涪陵縣西魏置合州乃移今州名矣按涪水音聲在十一尤韻而七虞無此字雖古韻相通蜀人舍本從他不知何謂郡隋廢為鎮唐武德初復

武隆縣

漢枳地唐武德初置縣因山名曰武龍國初易隆

彭水縣



彭鼓聲峽水澎湃似之隋開皇中與黔州同置宋紹定間陞為紹慶府以慶雲見於境也太宗時事益追改云廢洪杜縣洋水縣俱唐武德置今之洪杜溪洋水鄉是廢信寧縣隋大業置即今之信寧巡檢司也廢都濡縣唐貞觀置即黃山谷所稱都濡月兔茶也

黔江縣

秦黔中郡地隋開皇中於此置石城縣唐天寶中改名因郡舊也

酉陽宣撫司

秦得楚地因置縣於大酉山之陽屬黔中郡漢置郡為武陵牂柯矣唐徙治發川縣蓋今思州是黃巢之亂酉陽內訌駙馬冉人才征之留守其地即今理也宋元陞州冉氏世知州事國初改今官隸重慶府以石耶洞屬

石耶洞長官司

其洞有大石也宋宣和中楊昌安者太原楊業之裔也討平蠻亂蠻人畏服因世其地元時尚稱土知府國初

歸附隸酉陽後

邑梅洞長官司

邑以樹稱在酉陽之內宋末有楊光甫者亦楊業後據其地元改為拂鄉洞矣明玉珍改邑梅軍民府國初改今官隸酉陽永樂初改隸重慶

平茶洞長官司

吳之黔陽縣地也五代沒於番宋政和中得之置平茶洞猶乎葭萌以茶氏矣元改今官隸思州安撫後立軍

民府授楊大雷為世官國初改今官屬西陽改隸重慶  
下川東道屬

夔州府

管一州十二縣

春秋時子國秦漢巴郡地也獻帝初平中置固陵郡尋  
為巴東矣唐初曰夔天寶至德之載皆稱雲安郡乾元  
以後復稱夔至今按山海經岷山多夔牛注爾雅犝牛  
即犛牛也肉數千斤出蜀山或地有此獸或山形似之  
如犛為之類 江關都尉兩漢立漢書地里志云江關

都尉理魚復是也 白帝城公孫述立郡國志云述至

魚復有白龍出井中因號魚復為白帝城是也 永安

郡蜀先主立三國志云先主伐吳不利自夷道還改白

帝為永安郡是也 三巴校尉宋太始年立寰宇記云

山峽險隘多盜賊乃立三巴校尉以鎮之是也 信州

梁天監年立方輿云梁置信州治白帝城周移治永安

宮南是也 其後王孟二蜀以施夔忠萬置鎮江軍後

唐改寧江軍節度使宋因之南渡後陞為帥帶歸峽

州兵甲司公事 今下關城即江關瞿唐右所設白帝  
城學宮即永安宮址而材官屯戍皆隸楚以示犬牙相  
制之義

奉節縣

春秋時魚邑漢晉魚復縣也西魏易為魚人屬信州唐  
貞觀中改今名州廢而節存不忘信矣

巫山縣

楚為郡秦漢為縣皆曰巫矣加山字自隋始治南有山

如其字也晉曾置建平郡於此

大昌縣

本巫地晉置建昌縣尋改泰昌矣今名後周以避諱也  
後周宇文泰

大寧縣

晉北井縣周併入大昌矣宋開寶中始以鹽井地置大  
寧監與治側永安城相對取安寧之義也宋陞為州領  
縣五其一為大昌國朝降縣與大昌俱隸夔其四縣割

入陝之漢中

雲陽縣

胸臆舊縣地在縉雲山之陽也宋張瀨記形勝東有瞿塘西有縉雲矣後周為雲安縣宋置軍監元改今名

萬縣

梁置萬州於宣漢縣云其地有萬頃紀數也蜀漢之南浦縣以浦名後周之萬川郡以川名俱在縣治距治西百二十里武寧巡檢司則隋武寧縣之故址



梁山縣

西魏有魚泉縣分胸臆所置今縣又分自魚泉矣以高梁山為名張載所謂巖巖梁山者也尾入岷江

開縣

今理舊漢豐縣亦析胸臆置也後魏末年置開合二州以對待立義矣其曰盛山郡者以山名曰開江縣者以江名曰萬歲縣者以谷名曰新浦縣者以浦名 盛山開江俱在治前萬歲新浦相距兩舍

新寧縣

宕渠之地西魏廢帝始置取寧靜之義也

建始縣

漢巫縣地吳孫休改巫為建平郡始置今縣依郡立名也唐以後隸施州本朝隸夔

達州

管東鄉太平二縣

宕渠之東界胸臆之西界其地居四達矣後漢之宣漢縣梁之萬州西魏隋唐之通州通川郡更迭為稱宋改

今名以別於淮南之通州也 廢井州廢石城縣俱後  
魏廢帝立 廢永睦縣廢三岡縣俱梁大同立井州石  
城即宣漢地永睦三岡相距百里

東鄉縣

梁有新安縣析宕渠西界置西魏再析而為今縣與漢  
中西鄉分界故別之縣有巴渠里即舊巴渠縣址

太平縣

國朝正德十年割東鄉之太平里置因以為名

石碁宣撫司

漢屬牂柯郡後周以之置施州矣唐改曰清江郡重慶志以為宋之南賓縣也景定中有馬什用破元兵授鎮國上將軍石碁安撫領銅牌鐵印世守其地國朝初改為宣撫按宋地志南賓縣舊屬忠州案宇記牂州有賓化建安二縣賓化無事迹建安下載石潼柱蒲二關其殆合之以成義耶碁字韵不載疑即柱隸夔州府

遵義道屬

遵義軍民府

管一州四縣

漢夜郎且蘭二縣地屬牂柯郡唐貞觀始置郎州尋改播州乾符中沒於南詔太原人楊端收復之遂世有其地曰安撫司宋大觀改遵義軍取唐縣名也元陞播州宣撫司國朝改宣慰萬厯二十六年楊應龍反蕩平改府仍取唐名

遵義縣

唐貞觀中與郎州同置初名恭水再改而為今名即元

之播州鎮撫也國朝改長官司萬厯二十六年平楊酋  
改置

桐梓縣

亦平播置唐武德中以梓潼縣為充州開元改夜郎縣  
即此也縣曰桐梓存其半驛曰夜郎仍其舊

真安州

唐貞觀中置播川鎮尋改珍州以界有降珍山也宋乾  
德中刺史田遷乞改為西高州元復珍州明玉珍據蜀

改為真州自諱也國朝因之為長官司播平改流加安字


綏陽縣

隋大業中置屬思州宋大觀中於此置承州宣和中州廢地隸珍州今縣蕩平後置志云治在劬竹里又云黔之龍泉縣有綏陽場名本此

仁懷縣

唐貞觀五年置芙蓉縣從山名也地有仁水今縣從水

名





蜀中廣記卷五十三

欽定四庫全書

史部

蜀中廣記卷五十四至

詳校官編修臣翟槐

編修臣程嘉謨覆勘

總校官庶吉士臣何思鈞

校對官學正臣陳本

謄錄舉人臣曹勲祖

欽定四庫全書

蜀中廣記卷五十四

明 曹學佺 撰

蜀郡縣古今通釋第四

川北道屬

保寧府 管二州八縣

古巴國地秦置閬中縣後漢建安劉璋自安漢徙巴西郡於此唐宋則稱閬州矣元改今稱沿後唐保寧軍之

目 廢北巴西郡宋元嘉置廢南梁州梁天監置皆因  
李雄之亂理無定處 廢隆州廢盤龍郡皆西魏平蜀  
置盤龍者以郡南盤龍岡為名隆州者取其連岡地勢  
高隆為名後魏典畧云此州故有隆城謂之南隆唐先  
天避玄宗諱改為閬州 廢保寧軍節度使後唐天成  
置廢安德軍宋初置 按十道錄云果閬二州貞觀中  
屬劔南道天寶中屬同開元中屬山南道乾元中屬同  
若據地勢言之嘉陵江既在劔門之外流歷果閬合三

州而入涪江且三州同是漢巴郡之地合屬山南道

閬中縣

高門曰閬閬山四合邑居其中而水遶之 廢奉國縣  
梁大同中於此置白馬義陽二郡後魏恭帝二年廢義  
陽郡改為奉國縣以此地來附於魏故名元省入閬中  
縣志東百里有奉谷鄉國谷音同而譌

蒼溪縣

東漢漢昌縣也今縣隋改取蒼溪谷為名

南部縣

梁之南隆縣也今縣亦隋改以部分在郡之南 廢西  
水縣梁大同中於此置掌天成因掌天山為名後周閔  
帝元年改成為西水縣以界內西水為名元省入南部  
按府志城南五十里有西水橋是南部界 廢晉安縣  
按四夷縣道記梁於此置金遷成後周改為郡仍置晉  
安縣郡所理也元省入南部縣志北九十里有晉安堡  
廢新政縣唐武德中於此置新城縣後以隱太子諱

改為新政縣元省入南部縣志今之積善鄉是 廢新  
井縣唐武德中置縣界頗有鹽井因立斯名元省入南  
部縣志今之政教鄉是

### 廣元縣

元置廣元猶漢之廣漢也古葭萌地葭萌苴侯名蜀侯  
之弟續事始曰葭茶也蜀人以茶字郡 廢綿谷縣東  
晉太元中於此置興安縣隋開皇中改為綿谷縣以東  
南綿谷為名總志廢綿谷縣在廣元之烏奴城北 廢

平蜀縣後魏恭帝二年於此置義城縣隋改義清唐改  
眉山宋乾德三年平蜀改為平蜀縣且避諱也元併入  
廣元廢嘉川縣宋武帝於此置與樂縣後魏恭帝改  
為嘉川縣取嘉陵水所經為名後併入廣元憲綱有嘉  
川鄉是

昭化縣

古葭萌白水地秦使司馬錯自劔閣道伐蜀之所由也  
劉宋為宋安唐為益昌矣昭化舊屬利州利州蓋嘗稱



昭武者宋開寶敕改今縣沿其舊名 廢景谷縣本漢  
白水縣宋武帝於此置平興縣即元和志楊難當克葭  
萌分白水置平興者隋開皇中改平興為景谷縣即華  
陽國志陰平郡自景谷有步道徑江油左擔行出涪者  
按昭化憲綱縣北百里有白水鎮周圍五里俗稱沙州  
城也先主斬楊懷高沛於此 廢葭萌縣本漢葭萌地  
蜀先主改為漢壽晉武帝改為晉壽隋開皇始復舊名  
元省入昭化志云栢林鋪是葭萌縣故址 廢岐坪縣

宋武帝於此立宋安縣後魏廢帝改為岐坪取岐坪川  
為名宋改入昭化按晉書作岐愜未詳

劍州

蜀漢立梓潼郡霍峻之所守也諸葛武侯以大劍山至  
此有隘束之路故曰劍門唐始以之名州 廢南梁州  
廢安州俱梁時立廢始州西魏時立以先下安州始通  
巴蜀也 廢隆慶府宋時立以孝宗潛邸也 廢普安  
縣本郡也廢為縣今廢為驛在城 廢下辨縣宋元嘉

中以武都流人於此安置因立縣大明二年改為武連  
縣今併入州治西百里上亭驛是又二十里有武連橋  
廢劔門縣今為劔門驛華陽國志云劔閣三十里至  
險有閣尉桑下兵民也 廢臨津縣舊圖經云梁天監  
於此置相原縣隋開皇改為臨津縣以其俯臨潼水為  
名今州南二百五十里有義津即此地 廢普成縣周

地圖云梁於此置梁安縣天和中改為黃安縣唐末改  
為普成縣今州有普成鄉是按本志云故縣南一里紫

霄觀舊名普成觀晉宋間有李隱君名普成者煉形於此上昇廢華陽縣廢茂陵縣已上俱舊廢者益州志云宋大明年置此二縣一隸南安郡一隸扶風郡後魏俱廢廢七盤縣唐久視年於七盤山東南置山在廢武連縣之西俱併入州

梓潼縣

蜀古志云禹於尼陳山伐梓其神化為童子漢所為名縣也蜀晉之梓潼西魏之潼川郡理按此語出翰墨

全書方輿勝覽引之

巴州 管南江通江二縣

江流如字西魏實始稱州唐迄國初不改洪武九年降  
縣正德十年平山寇復為州 廢漢昌縣東漢時立廢  
歸化郡廢北水郡俱劉宋立以領獠戶 廢木門郡梁  
時立 廢大谷郡後魏立 廢清化郡隋大業立 廢  
靜州唐武德立 廢化成縣梁普通年於此置梁大縣  
後周地圖云大象二年改為化成縣以化成山為名州

志舊化成縣在治西五十步 廢恩陽縣梁普通年於  
此置義陽縣以義陽山為名隋開皇年改為恩陽縣按  
義陽山古名三峯山下有巴蛇洞即撫遺所載靜州知  
州王鶚子讀書義陽山而遇梅仙者靜州即巴州也

廢曾口縣梁普通年置以曾口谷為名今州東五十里  
有曾口渡 廢其章縣梁普通年置以其章山為名郡  
志舊其章縣在巴州東八十里有古蓮池是其故址本  
志作奇章以為即牛僧孺封邑未詳 廢始寧縣亦梁

普通置宋初併入其章 廢清化縣梁普通年於此置  
伏強縣隋開皇年改為清化縣州志舊清化縣在州西  
北六十里 廢盤道縣後魏恭帝置因龍腹山道路盤  
屈為名宋初併入清化

### 南江縣

後周之難江縣也唐沿西魏置集州矣宋廢州存縣國  
初易難為南 廢集州以東北集川水為名今縣學即  
集州址 廢符陽郡唐天寶立 廢符陽縣後魏正始

年置取符水為名本志東南隅廣濟橋銘有符陽縣字  
開元中刻也 廢大年縣唐武德年立取大年山為名  
宋初併入難江

通江縣

治枕巴江也唐時壁州理此國初徑屬府正德改隸巴  
州 廢諾水縣後魏大統年置按諾水潮聲聽之若諾  
應也此即宕水所激 廢壁州唐武德年置以縣西壁  
山為名今縣治即州故址 廢廣納縣以縣界廣納溪



為名宋初併入通江 廢巴東縣唐開元年於此置太平縣以太平川為名天寶改為巴東縣以處巴江之東為名宋初併入通江 廢白石縣後魏廢帝立以白石川為名本志縣東百里有舊白石古城周遭石壁可容萬人四隅石門亭址俱存有淳熙間題詠下為白石寺

### 利州衛

葭萌國梁承聖中為利州也前後曰漢壽者漢曰晉壽者晉曰小益者後魏曰義成者隋曰益昌者唐曰昭武

軍者偽蜀曰武寧軍者宋 衛與廣元縣同城廢址見  
前

順慶府

管二州八縣

安漢充國二縣地唐置果州取充實之義也一曰以郡  
南果山為名宋寶慶初寧宗潛邸遂有今號 廢巴郡  
劉璋立 廢南宕渠郡劉宋立 廢永寧軍五代蜀立  
按本志充國在城南安漢在城北各三十五里

南充縣

漢充國縣蜀增南字隋減國字是以有今稱也

西充縣

唐武德年析南充置西溪水出焉 廢流溪縣唐開耀  
年置即西溪也元省入西充

蓬州

管營山儀隴二縣

梁天監中置相如縣長卿桑梓也今名後周所改圖經  
云兩蓬高峙屹然雲霄 廢伏虞郡梁初置廢咸安郡  
唐天寶置 廢相如縣梁置兼立梓潼郡於此李商隱

詩梓潼不見馬相如是也相如故宅今為州治 廢蓬  
山縣梁大同中於此置綏安縣唐至德中改為蓬山縣  
今省入州

營山縣

分相如置朗池始梁終唐皆然宋祥符避諱改今名以  
治有山如營壘也 廢良山縣梁大同於此置安固縣  
唐開元改為良山縣元省入營山志云三十里有良山  
鎮縣址為興福寺 廢朗池縣以臨古朗池為名唐貞

元年移於營山歇馬館為理

儀隴縣

梁天監置在大儀山之坂坂大曰隴山有石銘儀隴二字  
廢隆城郡梁置兼立儀隴縣縣城在金城山頂四面懸絕石壁高八十丈周迴五里惟西南稍通人馬唐  
開元年移於山下平溪即今理也 廢伏虞縣隋開皇  
置以伏虞山為名元省入儀隴故址在縣東六十里  
廢蓬池縣梁天監於此置大寅縣取大寅山為名唐廣

德改曰蓬池取蓬水為名元省入儀隴

廣安州

管渠鄰水大竹岳池四縣

宋合果渠三州地開寶初於濃洄鎮置廣安軍取安輯之義矣元為府國朝降為州廢渠江縣後漢為賓城縣有古賓城在焉一名始安城梁於此置始安縣唐至德年改為渠江縣宋割屬廣安軍總志渠江舊縣在廣安州北五里

渠縣

漢宕渠縣也石過水為宕水所居為渠蜀漢晉隋皆置郡於此 廢流江縣周明帝立今為縣治

鄰水縣

水出鄰山中有大磧懸流十丈者也梁置 廢鄰山縣亦梁置鄰山者其山重疊鄰比相次也隋併入今縣有鄰山鎮

大竹縣

唐則天時析鄰水縣置紀勝曰達州之地有大竹小竹

蓋與縣接壤者 本志云地產大竹砍伐時有白兔走出始躬白兔寺因以名邑此邑舊省鄰山宋紹興復置

岳池縣

寰宇記云岳安山在縣東三十五里高六百丈岳池之水出焉唐析南充相如所置也

潼川州

直隸管七縣

左倚梓林右枕潼水隋曰梓州五代蜀重和以後槩曰潼川 廢東廣漢郡蜀先主立 廢新都郡晉時立



廢新州梁蕭紀立 廢昌城郡西魏時立 廢東川節

度使唐肅宗立 廢武德軍蜀王建立 廢靜戎軍安

靜軍俱宋立乾道間又陞瀘南為潼川府路安撫使而

潼川守臣兼果渠懷安廣安等郡兵馬事 廢郪縣常

璩云漢高帝六年置舊縣在今縣南九里臨江郪王城

基址見存又謂之郪郎也蜀志姜維等聞諸葛瞻破乃

引軍由廣漢郪道以審虛實即此地今在州治東 廢

涪城縣本漢縣後漢初吳漢入蜀裨將臧宮拔涪城即

此邑東晉立始平郡於此隋初郡廢縣存州志元省入  
鄆鄆復省入州又云涪城在州西北六十里 廢富國  
監本梓州鄆縣富國鎮新井煎鹽場也宋置監以董其  
事兼領通泉飛鳥等鹽井地去梓州九十里今併入州

射洪縣

西魏始置取射江為名土音以江為洪後周改之從俗  
也 廢通泉縣西魏於此置湧泉縣隋開皇改為通泉  
縣取其交注通流下即黃澍川也元省入射洪志云治

南五十里通泉古驛卽杜甫題詩處今為大浸寺

鹽亭縣

秦亭也梁大同始縣有鹽井 廢方安縣李膺蜀記云  
靈江東鹽亭井古方安縣也周地記梁大同元年於此  
立亭因為縣而方安廢矣 廢高渠郡周保定初置以  
臨梓潼水也隋開皇年廢為縣縣尋亦廢 廢西宕渠  
郡在安樂村李膺蜀記宋元嘉置領縣四宕渠宣城漢  
初東關是也梁天監廢 廢永泰縣唐武德年置元省

入鹽亭縣志永泰舊基在縣東北六十里 廢東關縣  
本鹽亭雍江草市也偽蜀明德以地去縣遠遂立招輯  
院宋初陞為縣元省入鹽亭志云治東百里有東關市

中江縣

後周為玄武縣隋唐因之宋祥符初勅崇真武併易今  
名以神泉涪城江流所會縣治當其中也在蜀為五城  
縣華陽國志云玄武漢時立倉發五城縣人尉部主之  
一曰五成按爾雅注成猶重也即玄武山 廢懷歸縣

李膺蜀記云宋元嘉九年置後周併入玄武縣 廢凱  
州隋開皇置宋省入潼川府 廢銅山縣本蜀道銅山  
之北漢文帝賜鄧通鑄錢即此唐貞觀年置監上元廢  
為縣元省入中江憲綱離城百七十里伏獅山乃銅山  
舊址 廢飛鳥縣故鄣王城也隋開皇置取飛鳥山為  
名元併入中江總志廢飛鳥縣在潼川州西南百三十  
里

遂寧縣

東晉置郡稱遂寧以其遂寧茲土也宋宣和初潛藩陞  
府元降州國朝降縣 廢廣漢縣漢高帝置以屬廣漢  
郡 廢德陽縣蜀先主置以屬東廣漢郡按德陽縣有  
二其一在川西者先主以屬梓潼郡 廢石山郡後周  
武帝立 廢總管府都督府及東川防禦使俱唐武德  
貞觀等年立 廢武信軍節度宋初立 廢小溪縣晉  
永和年置後魏恭帝改為方義縣宋太平興國避諱復  
為小溪元省入遂寧本志小溪廢縣附北郭廢遂寧縣

在東南一百里今稱下縣

蓬溪縣

本遂州地唐開元中置唐興縣於此天寶中改今名以蓬萊溪在其界內廢青石縣晉孝武帝於此置晉興縣後魏武帝改為始興縣隋改為青石縣以青石山為名九州要記云此山天下青石無佳於此可為鐘磬元省入蓬溪廢長江縣本東晉巴興縣後魏恭帝改為長江縣即涪江也唐賈島簿此縣元省入蓬溪今長江

壩是

安岳縣

李雄之亂沒於獠梁普通始置郡曰普慈後周曰普州  
隋改今縣以地在山上險而即安之義也洪武初尚名  
普州九年乃為縣 廢普康縣周武帝於此置永康縣  
隋開皇改為隆唐縣唐避玄宗諱改為普康縣今併入  
安岳縣本志普康鎮是 廢崇龕縣在今之古龕寺沿  
革未詳



樂至縣

唐武德三年置取樂至池為名 廢多葉縣周建德年  
置以有神曰多岳也宋併入樂至在今之茗山鎮 廢  
石羊縣元時析置今為石羊鎮

蜀中廣記卷五十四

欽定四庫全書

蜀中廣記卷五十五

明 曹學佺 撰

風俗記第一

後漢蜀郡太守陳留高朕雅播文教太尉趙公瑤  
初為九卿適子寧還蜀朕命為文學撰鄉俗記予  
倣之

川西道屬

禹貢華陽黑水惟梁州梁者彊也西方金氣彊梁之義  
春秋元命包云益州益者隘也言其氣急切而決烈也  
應劭風俗通云益者阨也言其地險阨而益廣也揚子  
雲方言蜀猶獨也不與外方同也又蜀賦云剛悍生其  
方風謠尚其武矣

華陽國志云地稱天府原曰華陽其精靈則井絡垂耀  
江漢遵流其卦值坤故多斑采文章其辰值未故尚滋  
味德在少昊故好辛香星應輿鬼故君子精敏小人鬼

黠與秦同分故多悍勇在詩文王之化被乎江漢之域  
秦豳同詠故有夏聲也漢地里志云人食稻魚俗不愁  
苦而輕易淫佚然地沃人驕奢侈頗異人情物態別是  
一方

蜀在有周之世限以秦巴雖奉王職不得與春秋盟會  
君長莫同書軌先有蜀王杜宇教民務農始稱帝曰望  
帝禪位於相開明帝升西山隱焉時適二月子鵲鳥鳴  
故蜀人悲子鵲鳥鳴也巴亦化其教而力農務迄今巴

蜀民農時先祀杜主君

秦孝文王時蜀守李冰壅江作壩穿郫江檢江別支流  
雙過郡下以行舟船岷山多梓栢大竹類隨水流坐致  
材木功省用饒又溉灌三郡間稻田於是蜀沃野千里  
號為陸海旱則引水浸潤雨則杜塞水門故記曰水旱  
從人不知饑饉時無荒年謂之天府也應劭風俗通云  
李冰為蜀太守開成都兩江溉田萬頃江神每歲須童  
女二人不然為水災冰因自以女與神婚徑至神祠前

勸酒酒杯常竭冰厲聲責之因不見良久有兩蒼牛鬪於江岼有間冰還流汗謂官屬曰鬪大極當相助也若知南向腰中正白者即我也頃復鬪主簿因刺殺北面者江神從此絕患民思其惠今有祠存宋祁作廟碑云俗歲擊羊豕雉魚伐鼓飲簫傾數十州之人奔走鼓舞以娛悅神

漢文帝末年廬江文翁為蜀守穿湔江口溉灌繁田千七百頃是時世平道治民物阜康承秦之後學校陵夷

俗好文刻翁乃立學選吏子弟就學遣雋士張叔等十八人東詣博士受七經還以教授學徒鱗萃蜀學比於齊魯巴漢亦立文學孝景帝嘉之令天下郡國皆立文學因翁倡其教蜀為之始也宋祁作廟碑云翁之治蜀開學校以詩書教人澡熨故俗長長少少親親尊尊百姓順而賴之按廬江舊志文翁名黨李知幾詩註翁字仲翁蜀人不敢斥其名字故但稱文翁

西漢王貢傳嚴君平卜筮於成都市以為卜筮者賤業



而可以惠衆人有邪惡非正之問則依著龜為言利害  
與人子言依於孝與人弟言依於順與人臣言依於忠  
各因勢導之以善從吾言者已過半矣

後漢書成都俗尚文辯好相持短長建初中廉范為太  
守每勵以淳厚不受媮薄之說又民物豐盛邑宇逼側  
舊制禁民夜作以防火災而更相隱蔽燒者日屬范乃  
毀削先令但嚴使儲水百姓便而歌之曰廉叔度來何  
暮昔日無襦今五袴

蜀志龐統說先主曰益州國富民殷戶口百萬寶貨無求於外今可權借以定大事先主入蜀諸葛亮為相治蜀以嚴有善必獎有過必罰人皆服其公明終蜀之世南征北伐徵調無虛日不敢出怨言亮死百姓遇節朔各私祭於道上勅止之不能禁

東晉之後李雄煽亂衣冠歿於夷獠蕭紀僭號疆土析入涼魏開皇混一俗染猶存隋地理志云蜀地四塞山川重阻水陸所湊貨殖所萃蓋一都之會也風俗大抵

與漢中不別其人敏慧輕急貌多叢陋頗慕文學時有  
斐然多溺於逸樂少從宦之士或至耆年白首不離鄉  
邑人多工巧綾錦雕鏤之妙殆侔於上國貧家不務儲  
蓄富室重於趨利其處家室則女勤作業而士多自閒  
聚會宴飲尤足意錢之戲小人薄於情禮父子率多異  
居其邊野富人多規固山澤以財物雄役故輕為姦藏  
權傾州縣此亦其一厄也

唐貞觀初高儉士廉為益州大都督隨方訓誘風俗頓

更又於李冰所創故渠之外別加䟽決大獲其利乃因暇日汲引辭人以為文會擇令儒生講論經史勉勵後進蜀中文學燦然復興故王勃夫子廟碑云天帝會昌之國英靈輩出之鄉庠序由其糾合纓弁所以會同文翁之景化不渝智士之風猷自遠也

二宗西巡疲於奔命王孟之季競為妖侈當王氏晚年俗作小帽僅覆其頂俛首即墮謂之危腦衍又好戴大帽每微服出遊民間民間以大帽識之因令國中皆戴

大帽又好裹尖巾其狀如錐而後宮皆戴金蓮花冠衣道士服酒酣免冠其髻髻然更施朱粉號醉粧國中之人皆效之劉纂疏曰下之從上如風偃草以仁義理化之則為謹愿之行以驕奢淫佚化之則為狂薄之俗今一國之人皆效醉粧臣恐邦基頽然如人之醉而不可支持也五代史唐莊宗遣李嚴來聘衍與偕朝上清宮上清宮者衍建以祠周王子晉也於時蜀都闌闌士女簾帷珠翠夾道不絕嚴見其民物富盛行又驕盈歸

而獻伐蜀之策焉迨孟昶末年婦女競治髮為高髻號  
曰朝天未幾而昶入朝京師識者謂其先兆舊說成都  
不打晚衙鼓劉仲張潛夫皆云孟蜀多以晚鼓戮人埋  
毬場中每鳴鼓則鬼祟必作自是承例不打晚衙鼓劉跂  
暇日所記也又蜀人質錢取息者每將徙居必榜其門  
曰召主收贖益周世宗累欲收蜀而不果至宋太祖乃  
收之是其應矣

宋初李順之變反側不寧張詠知府導以王化嘗曰前

日順脅民為賊今日吾當化賊為民也趙抃凡四入蜀  
以一琴一鶴自隨神宗聞之喜曰抃為政簡易亦稱是  
耳然俗好娛樂凡太守歲時晏集騎從雜沓車服鮮華  
倡優鼓吹出入擁導四方奇技幻恠百變序進於前以  
從民樂歲率有期謂之故事及期則士女闐道嬉遊以  
坐具列於廣庭謂之遨床謂太守為遨頭張趙二公雖  
持清嚴亦重拂其欲焉元祐二年臣蘇軾奉勅賜資政  
殿學士新差知成都府王安禮詔書銀合茶藥傳宣撫

問口宣云卿西南之寄古今所難蓋自祖宗以來式輟釣衡之舊與衆同樂非卿孰宜也

田況成都遨樂詩序云四方咸傳蜀人好游娛無時子始亦信然之逮忝命守益祝輳踰月即及春游每與民共樂則作一詩以紀其事自歲元徂景至止得古律長調短韻共二十一章其間上元燈夕清明重九七夕歲至之類又皆天下之所共豈曰無時哉傳之者過矣蜀之士君子欲予詩聞於四方使知其俗故序以見懷予



復取宋祁范成大陸游吳中復各詩註而附之以廣見聞

元日登安福塔陸游詩註云俗名黑塔也按成都古今記唐大中間建塔十有三級李順之亂燬於火祥符間重建仍十有三級初取材岷山得青石中隱白畫浮圖像十有三級梁柱欄楯厯厯可觀邦人以其神異而禮敬之

二日出城即東城也田況詩載邦人展墓事

范成大詩初三日出東郊碑樓院故事祭東君因宴此院蜀人皆以此日掃墓

廿八日謁生祿祠游淨衆寺宋祁詩注云州人以正月廿八日祠保壽侯及唐杜丞相棕祠堂

二月二日游江會寶厯寺即小游江也始於張公詠

十五日蠶市方輿勝覽云成都古蠶叢之國其民重蠶事故一歲之中二月望日鬻花木蠶器於其所者號蠶市

三月三日登學射山范成大詩云清明日試新火作牡  
丹會

丹淵集載成都燕集用一春為常三日不修已云遠甚  
然各有定處惟上巳學射山之會為盛山有通真觀祀  
張伯子其日兩蜀之人皆集從道士受秘籙以歸謂一  
年禍福率此日恭慢所致也

二十一日游海雲寺王霽詩序云成都風俗歲以三月  
二十一日游城東海雲寺摸石於池中以為求子之祥

太守出郭建高旗鳴笳鼓作馳騎之戲大譙賓從以主  
民樂觀者夾道百里飛蓋蔽山野譁譁嬉笑之聲雖田  
野間如市井其盛如此渤海吳公首作七言詩以寫勝  
賞席客吳中復范純仁韓宗道等更相酬和得十餘首

四月十九日泛浣花谿即大游江也任正一游記云成  
都之俗以游樂相尚而浣花為特甚每歲孟夏十有九  
日都人士女麗服靚妝南出錦官門稍折而東行十里  
入梵安寺羅拜冀國夫人祠下退游杜子美故宅遂泛

舟浣花溪之百花潭因以名其游與其日凡為是游者  
架舟如屋飾以繒綵連檣啣尾蕩漾波間簫鼓絃歌之  
聲喧闐而作其不能具舟者依岸結棚上下數里以閱  
舟之往來成都之人於他游觀或不能皆出至浣花則  
傾城而往里巷閭然自旁郡觀者雖負販莠蕘之人至  
相與稱貸易資為一飽之具陸務觀云予在蜀數年每  
赴此會必遇晴明成都戴白之老云未嘗見浣花日雨  
也

五日鬻香藥於觀街者號藥市鬻器用者號七寶市丹鉛錄云五月賣扇於街中謂之扇市

伏日宴江濱祠避暑因游江濱池此會始於文潞公

七月七日晚登大慈寺閣觀夜市即雪錦樓也

九月初九日藥市京鎗有調洞仙歌按成都古今記王生聞樂言吉凶無不中者嘗遊藥市聞五門奏樂不知涕之無從出告人曰嚮淳化甲午年方罹寇難今茲樂聲又將有甲午之變至明年正月王均叛

十二月十八日海雲寺賞山茶范成大有詩

揚雄蜀都賦曰其俗迎春送冬百金之家千金之公何  
畊錄二叟語云立春日通天下郡邑設土牛而礮之謂  
之班春所從來舊矣其說蓋微見於呂令而詳於續漢  
禮儀志大抵先王謹農事之遺意也成都大會自尹  
而下茗漕二使者之治所在焉將春前一日有司具旗  
旒金鼓俳優侏儒百伎之戲迎所謂芒兒土牛以獻二  
使者最後詣尹府遂安於班春之所黎明尹率掾屬相

與祠勾芒環牛而鞭之三匝退而縱民磔牛民謹譁攫攘盡土乃已俗謂懷其土歸置之耕蚕之器之上則蠶孽而稼美故爭得之雖一九不忍棄歲率以為常紹興丙子余往觀焉見二叟立牛側一叟撫牛而歎曰是孰象似汝孰丹堊汝孰引羣吏俎豆而羅拜汝方旗旄金鼓俳優侏儒百伎之戲雜然而前陳以導汝至此而空一府之人以觀汝也不亦榮而甚可樂歟俄而挺者競進擊者交下而汝始碎首折骨矣譟者奪者負者趨者



而汝始蕩為游塵散為飄風矣嗚呼悲哉今夫富貴之家高明之門倚勢而怙寵役物以自奉噓吸生風雲叱吒為雷霆偃然自以為莫已若也有不似茲牛之始至者乎及其權移而運去大者隕身赤族小者觸刑抵罪雖三尺孺子莫不聞而哀之有不似茲牛之既磔者乎吾悲夫禍福之無常而慶弔之相躡於俛仰之間也吾又悲夫造物者之戲人胡為而至斯極也吾是以歎一叟局局然笑曰子何言之陋耶是安從生自土而為泥

自泥而為牛土不知其為牛也自牛而遭磔磔而復為  
土土不知其非牛也彼既不知其為牛矣則雖象似之  
丹堊之俎豆而羅拜之與夫旗旄金鼓俳優侏儒百伎  
之戲迎而致之空一府而觀之彼且何榮而何喜乎哉  
彼既不知其非牛矣則雖擊之碎之敗之毀之彼且何  
懼而何戚乎哉牛固無所喜愠而世之人方且認外物  
以為已有其未得也挾術用數以致其必來而其既去  
則猶殫智極力以幸其少留也可不為之大哀乎其有

愧於茲牛多矣而造物者初何與莊子曰適來時也適去順也安時而處順憂樂不能入也子無庸歎嘗試以是觀之余竦然異其言迫而問之若何為者也二叟皆不告而去蜀固多隱君子哉按成都又有鬪牛之戲為李冰事

費著歲華紀麗譜云成都遊賞之盛甲於西蜀蓋地大物繁而俗好娛樂凡太守歲時宴集騎從雜沓車服鮮華倡優鼓吹出入擁導四方奇技幻恠百變序進於前

以從民樂歲率有期謂之故事及期則士女櫛比輕裘  
絃服扶老携幼闐道嬉游或以坐具列於廣庭以待觀  
者謂之遨床而謂太守為遨頭宋朝以益州重地嘗謀  
帥以命宋公祁宰相對曰蜀風奢侈祁喜遊宴恐非所  
宜宋朝不從卒遣之公先奉詔修唐書因以書局自隨  
至成都每宴罷盥漱闢寢門垂簾燃二椽燭媵婢夾侍  
和墨伸紙望之者知公修唐書若神仙焉嘗宴於錦江  
偶微寒命索半臂諸妓各送一枚公視之慮有厚薄之

嫌訖不服忍冷以歸舊俗傳誇以為談本田公況嘗為

成都遨樂詩二十一章以紀其實而薛公奎亦作何處

春遊好詩十章自號薛春遊呂從其俗且欲以易尹京

之舊稱

公知府專以嚴為治成都人謂之薛出油

此皆可以想承平之遺風

也至清獻公為記乃曰曩時宴會皆牙校掌之蓋榷酤

之利有餘人樂於為役公帑歲入亡慮千萬貫有奇自

新法頒行酒坊為官所鬻牙校雖得券錢不足自贍乃

者議置成都市易務方游觀時人情瞿然減常歲之半

今公使錢歲給三萬貫常廩廩慮不足譬之巨人以狹  
衾寢覆趾則露肩擁左則闕右甚可笑也今盤饌比舊  
從省樂優之給亦復過殺設遂廢之則非天子所以付  
畀一隅惠保遠人之意而小民之鬻者巢者但營慕供  
藉以為養此遊宴之不可廢也觀公此言則蜀人之貧  
富欣戚可以知政矣今以元日為始而第其事如左  
正月元日郡人曉持小綵幡遊安福寺塔粘之楹柱若  
鱗次然以為厭穰懲咸平之亂也塔上燃燈梵唄交作

僧徒駢集太守詣塔前張宴晚登塔眺望焉

二日出東郊早宴移忠寺舊名碑樓院晚宴大慈寺清  
獻公記云宴罷妓以新詞送茶自宋公祁始蓋臨邛周  
之純善為歌詞嘗作茶詞授妓首度之以奉公後因之  
五日五門蠶市蓋蚕叢氏始為之俗往往呼為蠶叢太  
守即門外張宴

上元節放燈舊記稱唐明皇上元京師放燈甚盛葉法  
善奏曰成都燈亦盛遂引帝至成都市酒於富春坊又

咸通十年正月二日街坊點燈張樂晝夜喧闐則放燈  
不獨上元也王孟時問亦放燈率無定日宋開寶二年  
命明年上元放燈三夜自是歲以為常十四十五十六  
三日皆早宴大慈寺晚宴五門樓甲夜觀山棚變燈其  
歛散之遲速惟太守意也如繁雜綺羅街道燈火之盛  
以昭覺寺為最又為殘燈會會始於張公詠蓋燈夕二  
都監戎服分巡以察姦盜既罷故作宴以勞焉通判主  
之就宣詔亭或涵虛亭舊以十七日今無定日仍就府



治專以宴監司也

二十三日聖壽寺前蠶市張公詠始即寺為會使民鬻農器太守先詣寺之都安王祠奠獻然後就宴舊出萬里橋登樂俗園亭今則早宴祥符寺晚宴信相院

二十八日俗傳為保壽侯誕出竿橋門即侯祠奠拜次詣淨衆寺邠國杜丞相祠奠拜畢事會食晚宴大智院

二月二日踏青節初郡人遊賞散在四郊張公詠以為不若聚之為樂乃以是日出萬里橋為綵舫數十艘與

賓僚分乘之歌吹前導號小遊江蓋指浣花為大遊江也士女駢集觀者如堵晚宴於寶曆寺公為詩有曰春游千萬家美人顏如花三三兩兩映花立飄飄似欲乘煙霞後以為故事及清獻公為記時綵舫增至數倍今不然矣

八日觀街藥市早宴大慈寺之設廳晚宴金繩院

三月三日出北門宴學射山既罷後射弓蓋張伯子以是日即此地上升巫覡賣符於道遊者佩之以宜蠶辟

災輕裾小蓋照爛山阜晚宴於萬歲池亭泛舟池中

九日觀街藥市早晚宴如二月八日

二十一日出大東門宴海雲山鴻慶寺登衆春閣觀摸石蓋開元二十三年靈智禪師以是日歸寂邦人敬之入山遊禮因而成俗山有小池士女探石其中以占求子之祥既又晚宴於大慈寺之設廳

二十七日大西門睿聖夫人廟前蚕市初在小市橋田公以禱雨而應移於廟前太守先詣諸廟奠拜宴於淨

衆寺晚宴大智院

寒食出大東門早宴移忠院晚宴大慈寺設廳曩時寒食太守先設酒饌於近郊祭鬼物之無依者謂之遙享後置廣仁院以葬死而無主者乃遣官臨祭之而民間上塚者各蟻集於郊外天禧三年趙公稹嘗開西樓亭榭俾士庶游觀自是每歲寒食闢園張樂酒爐花市茶房食肆過於蚕市士女縱觀太守會賓僚凡浹旬此最府庭遊宴之盛近歲自二月即開園踰月而後罷以酒

人利酒息或請於府展幾日府尹亦許之

四月十九日浣花佑聖夫人誕日也太守出笮橋門至梵安寺謁夫人祠就宴於寺之設廳既宴登舟觀諸軍騎射倡樂導前泝流至百花潭觀水嬉競渡官舫民船乘流上下或幕帟水濱以事遊賞最為出郊之勝清獻公記云往昔太守分遣使臣以酒均給遊人隨所會之數以為斗升之節自公使限錢後乃以隨行公使錢釀酒界之然不逮昔日矣

五月五日宴大慈寺設廳醫人鬻艾道士賣符朱索綵  
縷長命辟災之物筒飯角黍莫不咸在

六月初伏日會監司中伏日會職官以上末伏日會府  
縣官皆就江瀆廟設廳初文潞公建設廳以伏日為會  
避暑自是以為常早宴罷泛舟池中復出就廳晚宴觀  
者臨池張飲盡日為樂趙清獻公使限錢但為初伏會  
今因之

七月七日晚宴大慈寺設廳暮登寺門樓觀錦江夜市

乞巧之物皆備焉

十八日大慈寺散孟蘭盆宴於寺之設廳宴已就華嚴閣下散盆

八月十五日中秋玩月舊燕於西樓望月錦亭今宴於大慈寺

九月九日玉局觀藥市宴監司賓僚於舊宣詔堂晚飲於五門凡三日官為幕帟棚屋以事游觀或云有恍惚遇仙者

冬至節宴於大慈寺後一日早宴金繩寺晚宴大慈寺  
清獻公記云至前一日太守領客出北門石魚橋具樽  
豆觀樵已乃即天長觀晚宴蓋文潞公始為之後復罷

已上附郭

益部耆舊傳云楊統曾祖仲續舉河東方正授郫令甚  
有德惠人為立祠樂其風俗於是居焉漢書揚雄之先  
楊季官至廬江太守元鼎間避仇遡江處岷山之陽曰  
郫有田一壠有宅一區世世以農桑為業其俗之隩厚



可知也溫江故郫所分益州記云彭之土地肥良比於  
郫邑號小郫矣江原之地特好美田葛公云益州所需  
悉仰於蜀即此華陽國志稱其俗好歌舞危弦促管聲  
尤激切而陸游謂唐安有三千官柳四十琵琶也永康  
圖經其俗剛悍頗尚氣節而雜夷風縣西五十里有蠶  
崖關以振西山之走集而邊徼從此分矣

威茂古冉駹地土地剛鹵不生穀粟蔴菽惟以麥為質  
自古及今並無兩稅案宇記云州本羌戎之人好弓馬

以勇悍相高詩禮之訓闕如也男子衣羯羊皮鞞鞞婦人多戴金花串以瑟瑟而穿懸珠為飾疊石為礫以居如浮圖數重門內以梯上下貨藏於上人居其中畜豕於下高二三丈者謂之雞籠十餘丈者謂之碓亦有板屋土屋者自汶川以東皆有屋宇不立碓巢豹嶺以西皆織毛毯蓋屋如穹廬其地多冰寒盛夏凝凍不釋夷人冬則避寒入蜀傭賃自食夏則避暑反落歲以為常故蜀人謂之作五百石子也西入松州苦寒特甚日耕

野壑夜宿碣房刻木契以成交易炙羊膀以斷吉凶人  
人精悍習戰鬪矣

簡州治陽安宋闢耆孫碑陰記云東普慈西成都有東  
之朴有西之文蓋嘗出磊落瑰奇之士焉紹興黎持道  
院記云陽安隣於會府而有江山之勝處於高仰而有  
魚稻之饒民事獄訟比之旁郡十無一二凡隱於吏者  
樂趨焉人目之為西州道院案宇記云郡有獯人言語  
與夏不同嫁娶但鼓笛而已遭喪乃以竿懸布置其門

庭殯於別所至其體骸燥以木函盛置於山穴中按李膺云此四郡壤也而今則文質彬彬矣

資中或治盤石或徙內江皆謂之中水也圖經云王褒起資中以文詞顯於是東梓為多士之國劉光祖記云蜀東十數郡山水之秀不敢與資中抗文物亦然

陵州以鹽井為業以道陵得名丹淵集云州在崎嶇山谷之中城壘邑屋與巒嶺澗壑相為上下所領縣四戶口裁三萬稅錢止千三百緡租不滿萬石土田瘠鹵民

頗善耕稼然其性椎質各守護本業不憚作訴訟事又  
郡縣志云俗愿慤而好靜公議而無私有古淳質之風  
今亦恐漸訛矣

漢益州或治廣漢或治綿竹古語云大旱不旱蜀有廣  
漢蜀記云浸以緜維故廣漢謂之淵府也新都與成都  
廣都各為三都之一故號名城兼有金堂山焉綿竹以  
姜詩力孝宅曰汎鄉以任安教授俗侔洙泗德陽有望  
秦之里彰明有庶邈之泉皆以人重也

郡國志云左綿界東西二川北負梁雍風氣所濡各得其偏故其俗文而不華淳而不魯剛而不狠柔而不弱三國志先主入涪宴於山上顧謂龐統曰此州之民其富樂乎陳谿唐昌草市記云諸葛武侯以蜀旌旆故令陞邑翊日而市意在習其筋力而俟之征徭又每及上春以蠶為名因定日而有所往也

案宇記云龍州風俗與劔州同然山高水峻人多癯而癯聾蓋山水之氣使然

酈道元曰廣柔縣有石紐鄉禹所生也今夷人共營之  
地方百里不敢居牧有罪逃野捕之者不逼能藏三年  
不為人得則共原之言大禹之神所祐也

江油令許醇民謠序所向皆山石少平陸鮮穀稻人悉  
仰食於綿劍鄰邑舊經云岩居谷處多學道經罕有儒  
術

已上外郡縣

岑參招北客文云蜀之先曰蠶叢兮縱其目以稱王當

周室陵頽兮亂無紀綱洎乎杜宇從天而降鼉靈沂江而上相禪而帝據有南國之九世蜀本南夷人也皆左其袵而椎其髻及通乎秦也始於惠王之代五牛琢而秦女至一蛇死而力士斃二江雙注羣山四蔽其地卑濕其風胜脆蠻貉雜處滇犍為隣地偏而兩儀不正寒薄而四氣不均花葉再榮秋冬如春暮夜多雨朝旦多雲陽景罕聞陰氣恒昏以暑以濕為瘵為癘氣浥熱以中人吾知虛臄之疾兮將嬰爾身蜀之不可往北客歸



去來兮若乃高山萬重峻極屬天西有崑崙其峯相連  
日月迴環礙於山巔巒嵯盤欽天壁曼絕陽和不入陰  
氣固閉千年層冰萬古積雪谿寒地坼谷凍石列夏月  
草枯春天木折蒼煙凝兮黑霧結人墮指兮馬傷骨江  
水噴激迴盤紆紫棧壁緣雲鉤連相撐繩梁嵒虛傍沓  
杳冥下不見底空聞波聲過者矍然亡魂喪精復引一  
索其名為罕人懸半空度彼城壑或如鳥兮或如獾倏  
往還來幸不落乃有豪豬千羣突出如牛修角鈍劒癰

軀餓虢爭肉吼怒闐闐不休復有高崖墜石兮聲如雷  
之軒轟上敲下磕似火迸兮滿山流星礪豁忽兮倒流  
林岼為之顛傾驚騰狖與過鳥駭木魅兮山精闕深榛  
努鬣射人寒熊孔碩登樹自擲見人則擘巨麋飛石壓  
人兮不可行西有犬戎與此山通行貌類人言語不同  
擅廬隆穹毳裘蒙茸啜酪啖肉持鎗挾弓依草及泉務  
戰與攻其聲如犬其聚如蜂中國之人兮或流落於其  
中豈知掘鼠茹雪以為食終當斂其足而累其胸泣漢

月於西海思故鄉於北風蜀之西不可以往北客歸去  
來兮

蜀中廣記卷五十五

欽定四庫全書

蜀中廣記卷五十六

明 曹學佺 撰

風俗記第二

上下川南道屬

華陽國志云綏和五年犍為上寶磬十六劉向以為美  
化所降用立辟雍而士多仁孝女性貞專王莽改曰西  
順郡人不曾更始都南陽遠奉貢職及公孫述有蜀郡

拒守述伐之郡功曹朱遵逆戰衆寡不敵遵絆馬死戰  
遂為述所并而任君業閉戶費貽素隱光武帝嘉之曰  
士大夫之郡也嘉州教授任熙明題名記云蜀為西南  
巨屏繇漢以來號為多士莫盛於眉益二邦而嘉定次  
之張剛通義圖序云後世以蜀學比齊魯而蜀之學者  
亦獨盛於通義政和御筆西蜀惟眉州學者最多修譙  
樓記云其民以詩書為業以故家文獻為重夜燃燈誦  
讀聲琅琅相聞矣

蘇軾遠景樓記云吾州之俗有近古者三其士大夫貴經術而重氏族其民尊吏而畏法其農夫合耦以相助蓋有三代漢唐之遺風而他郡莫之及也始朝廷以聲律取士而天聖以前學者猶襲五代之弊獨吾州之士通經學古以西漢文詞為宗師方是時四方指以為迂闊至於郡縣胥吏皆挾經載筆應對進退有足觀者而大家顯人以門族相尚推次甲乙皆有定品謂之江鄉非此族也雖貴且富不通婚姻其民事太守縣令如古

君臣既去輒畫像事之而其賢者則記錄其行事以為口實至四五十年不忘富商小民常儲善物而別異之以待官吏之求家藏律令往往通念而不以為非雖薄刑小罪終身有不敢犯者歲二月農事始作四月初吉穀稚而草壯耘者畢出數十百人為曹立表下漏鳴鼓以致衆擇其徒為衆所敬畏者二人一人掌鼓一人掌漏進退坐作惟二人之聽鼓之不至至而不力皆有罰量田計功終事而會之田多而丁少則出鈔以償衆七



月既望斬艾而草衰則仆鼓決漏取罰金與償衆之錢  
買羊醺酒以祀田祖作樂飲食醉飽而去歲以為常其  
風俗益如此故其民皆聰明才智務本而力作易治而  
難服守令始至視其言語輒了其為人其明且能者不  
復以事試終日寂然苟不以其道則陳義秉法以譏切  
之故不知者以為難治云

寰宇記云嘉州金燈山即至樂山其趾有淵每歲人日  
郡守於此修油卜故事謂以油灑水面觀其紋驗一歲

之豐歉

眉州志云人日州人游重瞳觀觀有仙翁洞云重瞳真人  
淘丹處洞出靈鱗色白見者生貴子老泉曾禱之在  
驀頤山下子瞻詩云春風陌上驚微塵人物初樂歲華  
新時間正好路傍飲麥短未怕遊車輪城中車馬厭城  
郭喧闐競出空四隣歌舞驚山草木動簞瓢散騎烏鳶  
馴何人聚衆稱道人遮道賣符色怒嗔宜蠶使汝繭如  
瓮宜畜使汝羊如麇路人未必信此語強為買服禱新

春道人得錢徑沽酒醉倒自謂吾符神子由和云江上  
冰消岼草青三三五五踏青行浮橋沒水不勝重野店  
壓糟無復清松下寒花初破萼谷中幽鳥暫嚶鳴洞岩  
泉脉龍睛動宮觀丹墀鴨舌生山下瓶罌霏穉孺峰頭  
鼓樂聚簪纓縞裙紅袂臨江影青蓋驂騑踏石聲曉去  
爭先心蕩漾暮歸誇後醉縱橫最憐人散兩軒靜坐愛  
斜陽着樹明劉績霏雪錄云踏青之遊惟在春時未聞  
指某月日者蘇頴濱踏青詩序云眉之東門十數里有

山曰驀頤山有亭榭松樹下臨大江每正月七日士女相與嬉遊飲酒於其上謂之踏青也

通義志云二月十五村人鬻田器於市因作樂縱觀以爲蠶市子瞻和子由蠶市詩云蜀人衣食常苦艱蜀人遊樂不知還千人耕種萬人食一年辛苦一春閒閒時尚以蠶爲市共忘辛苦逐欣歡去年霜降斫秋荻今年箔積如連山破瓢爲輪土爲釜爭買不翅金與紬憶昔與子皆童艸年年廢書走市觀市人爭誇鬪巧智野人

暗啞遭欺瞞詩來使我感舊事不悲去國悲流年霏雪  
錄云眉之蠶市見穎濱詩序坡有荻箔瓢輪土釜等語  
蓋箔即曲薄薦蠶者也破瓢為輪土為釜者繅所用具  
耳

後漢書曰岑彭至武陽蜀刺客詐為亡奴降夜刺殺彭  
蜀人憐之為立廟歲時祠焉眉州志云五月二十三州  
人賽土主祠祀岑彭其日蓋岑死事也必有霖雨之應  
眉人諺云天乾不繫乾但看五月二十三

上南志云不午日競渡而六月二十四日競渡二郎川主誕辰也樂以賀之七月祭先用弱頭謂之鬼弱

楊微之嘉州詩云俗遇臘辰持藥獻吏逢衙日隔花叅耆宿因來問封部竹籬西畔是雲南

眉俗歲晚相與餽問曰餽年節東坡詩云農工俱已收歲事各相佐為懼恐無具假物不論貨山川隨出產貧富稱小大真盤巨鱗橫登籠雙兔卧富人事華靡綵繡光翻座貧者媿不能微贄出春磨官居故人少里巷佳

節過亦欲舉鄉風獨唱無人和

眉俗除夕守歲酒食相過名曰別歲東坡詩云故人適  
千里臨別尚遲遲人行猶可復歲行那可追問歲安所  
之遠在天一涯已逐東流水赴海歸無時東隣酒初熟  
西舍粳亦肥且為一日懽慰此窮年悲勿嗟舊歲別行  
與新歲辭去去勿回頭還君老與衰

已上嘉眉

古有輜軒之使以采風俗惟嚴君平與臨邛林公孺知

之皆為揚雄所師予觀陳子昂冬夜臨邛李錄事宅集  
序云下官遊京國久矣接軒裳衆矣池臺鐘鼓雖有會  
於終朝琴酒管絃未窮懽於永夕豈非殊我親愛異我  
風俗而使臨堂有懷聞樂增歎者也何功曹舊州耆老  
迹尚於沉寘李錄事吾土賢豪義多於游俠樓臺若盡  
臨故國之城池軒蓋如雲總名都之車馬於是而興自  
此而游安得不放意留歡遺老忘死者歟文同桂花閣  
記畧云邛為要州地物繁縟俚師陋士亦備文采章逢



彬蔚實逾於他邦矣

華陽國志云秦惠文始皇克定六國輒徙其豪俠於蜀  
資我豐土家有鹽銅之利戶專山川之材居給人足以  
富相尚故卓王孫家僮千數程鄭各八百人簫鼓歌吹  
擊鐘肆懸富侔公室豪過田文漢家食貨以為稱首蓋  
亦地沃土豐奢侈不期而自至也宋張上行曰此郡昔  
有四利今有四害曰茶曰鹽曰酒曰鐵他郡或有其一  
或有其二而吾邛獨全昔以為利民競豪富今以為害

民皆貧薄矣

邛州志云州人插秧所擊鼓曰長腰以木為身首尾蒙皮泥塗其面繫以長纒擊以大槌和以俚歌所以侑勤今則貌矣歲旱祈雨有打泉之說田至百十丈高遠者接長竹引水溉之或接至六七十竹者又有戽水者編竹篾如舟中戽斗狀繫二繩其耳二人峙立執繩取水溉之田高七八尺一丈以上用此亦桔槔之屬也

梁益志云大小漏天在雅州西北山谷高深沉晦多雨

舊說黎州常多風雅州常多雨故謂黎風雅雨九州要  
記云沉黎縣即諸葛武侯征羌之路也每十里作石樓  
令鼓聲相應今夷人效之所居悉以石為樓地多長松  
而無雜木孫漸清嘯樓記云襟帶印笮羈縻諸蕃郡縣志  
云宋初曹光實父子以忠義奮迨皇祐始有登科者

雅州志云西郭有聖母廟出靈關道天聖八年西戎叛  
神默相戎潛遁賜號金蟬聖母紹興間金將侵蜀甚急  
宣撫吳玠及弟璘夢聖母傳九曲陣法後戰一晝夜十

一捷兩敗金兵再奏封焉舊俗每歲上元日挿竹隙地  
排點九曲蓮燈歌謠鼓舞以表九曲之陣報神功也榮  
經蘆山亦然

志又云宋時雅安景自芳破賊有功常以二月十二作  
寒食今州人多從之號景村寒食

寰宇記云黎州番部與漢人博易不使見錢漢用紬絹  
茶布番用紅椒鹽馬又云邛雅之夷獠婦人娠七月而  
產產畢置兒水中浮者取養沉者棄之千百無一沉者

長則拔去上齒加狗牙以為華飾今有四牙長於諸牙而唇高者別是一種能食人無長齒者否俗信妖巫擊銅鼓以祈禱至今蘆山縣新安鄉五百餘戶即其遺人也

已上邛雅

叙南古戎州取西戎即敘之義蜀人呼敘為遂不知何所本華陽國志稱其民徵巫好鬼妖圖經云夷夏雜居風俗各異蓬戶茅簷髻髻詭服頓首拊掌而歌杜甫宴

戎州楊使君東樓詩勝絕驚身老情忘發興竒坐從歌  
妓密樂任主人為重碧拈春酒輕紅擘荔枝樓高欲愁  
思橫笛未休吹蘇子瞻過敘州詩江水通三峽州城控  
百蠻亂山圍古郡市易帶羣蠻瘦嶺春耕少孤城夜漏  
闌往時邊有警征馬去無還自頃方從化年來亦歛關  
頗能貪漢布但未脫金環何足爭強弱吾民盡玉顏司  
馬君實送張寺丞知富順監詩漢家五尺道置吏撫南  
夷欲使文翁化兼令孟獲知盤堆蒟醬實歌雜竹枝詞

韓繹詩山高地笮江水惡刀耕火種黎民疲解旦詩亭臺處處垂楊影街巷家家小酒旗此皆敘述風景之大槩也

江陽土地雖迫山川特美鹽井魚池一郡豐沃華陽國志云俗好文刻少儒學多樸野蓋天性也漢光武時被謫不使冠帶者數世其後文風則自宋尚書楊汝明始創五峰書院以為士友會課之所而士翕然興起矣

宋都巡檢使鄧巽陽江安安濟廟記曰邑城外汶江洧

溪滙流之處陰厓峭峙下臨深潭有神宅焉號曰五龍  
凡水旱疫癘人有急難丐休於神隨禱輒應形於夢卜  
惟姓氏未由可考予按雲笈七籤云人皇之後五龍氏  
興焉降於開明之國以道治世蒼生於中化生是後運  
動陰陽作為五行四微世欲生死之業於是而起人乃  
任性混朴茹毛飲血男女無別夏則巢居冬則穴處此  
固風俗之權輿也

尹吉甫誦清風穆如州人建祠祀之即取清穆之名生



子伯奇至孝後母譖之自投江中衣苔帶藻忽夢水仙  
賜以美樂揚聲悲歌船人學之吉甫聞其聲援琴作子  
安之操尚有遺音焉

孝子傳云轅道縣孝子隗通為母汲江裔水天為出平  
石生江中今石在馬湖江縣民多踞此石以汲水又有  
吳順養母至孝赤烏巢其門人皆化之

益部耆舊傳引諺云符有先絡轅道張帛帛子廟在鴛  
鴦圻有飛霞井赤甃自井中出貫日觀者如堵因建飛

霞閣焉漢時太守圖先絡之象懸於州門以風來庶  
戎瀘皆有諸葛武侯廟每歲蠻人貢馬相率拜於廟前  
慶符有順應廟乃祀馬謖者歲以三月二日致祭馬湖  
之夷歲暮百十為羣擊銅鼓歌舞飲酒窮晝夜以為樂  
其所儲蓄弗盡弗已謂之諸葛窮夷法

黃魯直初謫涪州別駕自號涪翁量移戎州邦人好事  
者多從之游其後溪山悉號曰涪黃太史祠堂記云戎  
州以涪翁重詩書禮義之澤漸漬至今

唐庚子西自眉來居於瀘之安夷門外有瀘川六言詩  
云百斤黃鱸鱠玉萬戶赤酒流霞餘甘渡頭客艇荔枝  
林下人家又詩云歌唱竹枝終日楚笛吹梅弄數聲羌  
蓋瀘州自宋時已為商賈輻輳五方雜處者矣

已上叙馬瀘

岑參招北客文云其南則有邛崃之關天設險難少有  
平地連延長山橫亘瀘江傍隔百蠻吁彼漢源上當漏  
天靡日不雨四時霽然其人如魚爰處在泉終年霖靈

時復日出斨斨諸犬向天吠日人皆隰寢偏死腰疾復  
有陽山之路毒瘴下凝白日無光其氣曹曹暑雨下濕  
黃茅上蒸南方之人兮不敢過豈止走獸踣兮飛鳥墮  
吾不知造化兮何致此方夢蜀之南兮不可以居北客  
歸去來兮

蜀中廣記卷五十六

欽定四庫全書

蜀中廣記卷五十七

明 曹學佺 撰

風俗記第三

上下川東道屬

臣蘇軾撰燕若古知渝州詞頭云敕具官燕若古汝向  
以才選奉使東方官省而歸因以得郡蓋可謂異恩矣  
巴峽之嶮邑居褊陋負山臨谷以爭尋常獨渝為大州

水土和易商農會通賦役爭訟甲於旁近毋以僻遠鄙夷其民欽哉

華陽國志稱其民質直好義土風敦厚有先民之流故其詩曰川岷惟平其稼多黍旨酒嘉穀可以養父野惟阜丘彼稷多有嘉穀旨酒可以養母其祭祀之詩曰惟月孟春獮祭彼岷永言孝思享祀孔嘉彼黍既潔彼犧惟澤蒸命良辰祖考來格其好古樂道之詩曰日月明明亦惟朝夕誰能長生不朽難獲又曰惟德實寶富貴

何常我思古人令聞令望而其失在於重遲魯鈍素樸  
無造次辯麗之氣俗之送葬必高墳瓮牖祭奠而羊豕  
夕牲贈襚兼加贈賻過禮焉

漢桓時巴部太守但望上疏曰郡治江州時有溫風遙  
縣客吏多有疾病地勢剛嶮皆重屋累居數有大害又  
不相容結舫水居五百餘家承三江之會夏水漲盛壞  
散顛溺死者無數而江州以東濱江山險其人半楚姿  
態敦重墊江以西土地平敞精敏輕疾上下殊俗情性

不同敢欲分為二郡一治臨江一治安漢也

韓詩云嬺巴人歌也嬺嬺往來貌華陽國志云五教雍和秀茂挺逸英偉既多而風謠旁作矣宋眉山史用之崇德廟碑文云巴俗故有鷄豚社予初入社中祝史以記請遂為之作云爾

案宇記云大凡蜀人風俗一同然邊蠻界鄉村有獠戶即異也今渝之山谷中有狼狽鄉俗構屋高樹謂之閣閣不解絲竹惟坎銅鼓視木葉以別四時父子同諱夫



妻共名祭鬼以祈福是所異也

江津舊志云農勤畝畝士業詩書有石公恕之風而人多敦睦有杜莘老之風而士多剛直

古塾江志表之以四山之環合中之以兩溪之襟帶田畝桑麻左右交映人生其間多秀異而喜習詩書按即今之合州屬縣地勝覽云州北五里有北嶺或附會為濮巖非也岩有栢數十章率圍八九尺有定林院正月九日郡守以故事設宴遊人盛集又每歲八月八日郡

守率僚屬宴集於釣魚山山有巨人跡相傳異人坐其上投釣於江中云

昌州昔治大足充靜南軍使宋太守于保道院記云界介資普富義瀘合之間其俗朴厚又多秀民衣食之物資以養生者不及他郡雖無舟楫江沱之利而有桑麻黍稷之饒楊子謨顯惠廟記云靜南山水奇秀士大夫避地者多居焉仙靈逸迹尚有董葛之遺風冷齋夜話載有人調官都下得昌守求易他郡淵才聞而往見之

曰官欲易地誤矣靜南佳郡也問何以稱佳淵曰海棠  
患無香獨靜南者有香非佳郡而何故昌號海棠香國  
也宣和太守張唐民詩無訟正如高隱地隆冬方似早  
春天州民富庶風光好誰信無憂蒲二年按即今之榮  
昌大足永川地也官茲方者輒稱民不馴於法難以計  
治功何今昔頓殊乃爾

真景元送南平江知軍序云南平故漢巴淪地至唐猶  
以獠名宋元豐中聲教遠浹始即其地置軍焉百三四

十年間浸以道德薰以詩書斌斌然與東西州等何麒  
軍學記云四民冠婚相襲耕桑被野蔚為中華也

華陽國志涪陵山險水灘人性戇勇多獯蠶之民縣邑  
阿黨鬪訟必死無蠶桑少文學漢時赤甲軍常取其民  
蜀丞相亮亦發其勁卒三千人為連弩士其性質直雖  
徙他所風俗不變

巴子之時陵墓多在枳其畜牧在沮今東突碇下畜沮  
是也又立市於龜亭北岼今新市里是也龜陵志云風

土煦煖五月半早稻已熟便可食新七八月間收割已畢故有樂溫之號

宋翰題涪陵郡詩錦繡洲猶在熊羆夢已無文風齊兩蜀仙洞接三都白石從天設青崖見地圖荔枝妃子國不復曩時輸陸務觀詩官道近山多亂石人家避水半危樓

水經注云平都縣有天師治兼建佛寺甚清靈縣有市肆四日一會南賓郡所轄也忠州題名記云有巴蔓子

仗節死義之遺風故士頗尚氣有甘興霸文廣休任俠  
之餘烈故士多倜儻黃魯直四賢閣序云郡自開元以  
前訖於會昌劉士安陸敬輿李宏憲白樂天四君子者  
相繼出守凜然猶有生氣忠民每以此自負而郡守至  
者必矜式焉

杜甫詩忠州三峽內井邑聚雲根小市常爭米孤城早  
閉門空看過客淚莫覓主人恩淹泊仍愁虎深居賴獨  
園白居易詩山上巴子城山下巴江水中窮獨人強

名為刺史時時竊自哂刺史豈如是食粟餽家人黃蠟  
裹妻子注云忠州刺史已下悉以畬田粟給祿食以黃  
絹支給充俸自古相傳風俗如是又郡中春宴詩薰草  
鋪坐席藤枝注酒尊鑾鼓聲坎坎巴女舞蹲蹲圖經云  
蜀地多山多種黍為酒民家亦飲粟酒地產藤枝長十  
餘尺大如指中空可吸謂之引藤屈其端置醅中注之  
如晷漏本夷俗所尚土人效之耳

寰宇記云忠州有夷獠頗類黔中正月三日拜墳墓二

月二日携酒郊外迎富除夜然燈照先祖墓也

黔州圖經地近荆楚候如巴蜀五溪襟束為一都會路  
途濶遠亦無館舍凡至宿泊多倚溪岩就水造殮鑽木  
出火黃魯直與秦太虛書曰某屏棄不毛之鄉以禦魑  
魅耳目昏塞黔中一老農耳其作縣題名記云黔江縣  
治所蓋未聞黔中郡時歌羅蠻聚落也於今為縣二鄉  
七里戶千有二百其秋賦庸催不登三十萬錢以地產  
役於公者八十有五其義軍二千九百招諭夷自將其



衆者五百七十其役於公之人質野畏事大略與義軍  
夷將領不殊也使之非其義或跳梁不為用決訟失其  
情或擄掠以償直暗則小智者亦混疆畔而為欺懦則  
細黠吏亦能用其柄市麝臍以百計市蜂蠟以千計貧  
則夷以長吏為侮寬則以利啗胥徒而苟免猛則鳥獸  
駭而奏箐中矣至今令得其人篩垢爬痒民以安堵而異  
時號為難治吾不知其說也

已上重慶

劉禹錫夔州刺史壁記云源乾曜為州叅軍修圖經言  
風俗甚備其別夔州官吏詩云三年楚國巴城守一去  
揚州楊子津惟有九歌詞數首里中留與賽蠻神後黃  
魯直過夔門書之

臣蘇軾奉敕王公議夔州路轉運使程高夔州路轉運  
判官等役法既復民知息肩矣然在官者皆農末也三  
峽之民刀耕火耘與鹿豕雜居正賴良使者察其侵冤  
使政煩而吏貪者此等豈能遠訴乎朕以大臣薦故擢

用爾若遠民無告非獨汝咎將咎薦者可不勉哉丁謂  
移城記云州居高唐上游即白帝舊址雉堞登降里閉  
重複倚山抱江遠迤數里而南北咫尺衝門比屋構之  
磴道往往編苦架竹家於洲渚隨波遷徙莫寧厥居無  
巷市無阡陌或人火為災則東西路絕撲滅無所層甍  
疊棟盡煨燼而後已故家至戶到每穴地以藏產其為  
僻陋也如是本道轉運使薛顏知州侯延賞得郡民狀  
願遷於瀼西即永安故宮有唐之舊城也民樂新構如

歸如趨旁瞻瞿唐下瞰陣磧通莊大道坦若綦布虫虫  
之氓出處平陸涵泳方洲於是乎始知土著之為適與

杜少陵蜀先主廟詩蜀主窺吳幸三峽崩年亦在永安  
宮翠華想像空山裏王殿虛無野寺中古廟杉松巢水  
窟歲時伏臘走村童武侯祠屋長隣近一體君臣祭祀  
同圖經夔人重諸葛武侯以人日傾城出遊八陣圖謂  
之踏磧遊婦人拾小石之可穿者貫以彩索繫於釵頭  
以為一歲之祥府帥宴於磧上王梅溪詩今日為人日

傾城出江臯遨頭老病守呼賓酌春醪陸務觀詩鬼門  
關外逢人日踏磧千家萬家出

常璩志郡與楚接人多勁勇少文學有將帥材宋何郯  
夫子殿記云夔為州於巴東最大其風俗嗜好語言較  
荆楚不甚遠當列國時楚顯顯多良才夔為楚疆至今  
未聞有用儒顯者民家子弟壯則逐魚鹽之利富有餘  
貲輒以奉事鬼神它則不暇知耳李貽孫都督府記云  
其人豪其俗信鬼其稅易征其民不偷也

宋肇詩序夔冬暖雪不到地惟山高處白杜詩注云峽  
土磽确煖氣既達故民燒地而耕謂之火耕范致能勞  
畬耕序硤民平生不識秔稻而未常苦饑陸游杜少陵  
故宅記云東屯之田可得百許頃稻米為蜀第一郡給  
諸官俸廩以高下為差帥漕月得九斗故王龜齡詩云  
少陵別業古東屯一飯遺忠畝存我輩月叨官九斗  
須知粒粒是君恩

杜甫引水行月峽瞿唐雲作頂亂石崢嶸俗無井雲安

沽水奴僕悲魚復移居心力省白帝城西萬竹竿接筒  
引水喉不乾人生留滯生理難斗水何值百憂寬王龜  
齡詩夔州苦無井俗癭殊可憐丁寧後來者莫負義名  
泉按趙不拙義泉記不知誰氏子告郡帥引三泉每擔  
輒鬻十金入公帑大暑中烈日如灼細民操瓢遶舟傍  
徨嚙津欲涓滴潤喉有不可得自待制王公十朋始下  
令罷之易名為義泉任民取用一方大悅

杜詩異俗吁可恠斯人難並居家家養烏鬼頓頓食黃

魚沈括筆談曰峽中人呼鷓鴣為烏鬼溫叟詩話以為  
豬元稹詩病賽烏蠻鬼巫占瓦代龜巖端常藝苑雌黃  
亦曰烏蠻鬼吳虎臣漫錄曰老烏神也若養鷓鴣與豬  
則未為異俗可恠矣但養字當讀作去聲

開州都梁南浦雲安皆漢朐�縣也注云其地下濕多  
朐�蟲故名此蟲為瘴善中人避之則吉盛山學記云  
士以續文相高有溫造柳公綽之餘烈梁山軍題名其  
民未常造難聽之訟以溷有司守居蕭然閱句無訟牒



至廳下軍西之田獨平行可畊前涪後峽挾以夔萬皆  
崇山還委南浦記云土地多泉民賴魚畧西魏於此置  
魚泉縣也唐商真君飛昇記雲安風俗淳厚陶染真風  
如瞿法言楊雲外之徒繼出故琳宮秘館獨盛他處杜  
子美詩峽裏雲安縣江樓翼瓦齊兩邊山木合終日子  
規啼范致能詩雲安酒釀麥米賤家家扶得醉人歸  
通川圖經云水航於蜀陸肩於雍樓雉丹漆屢用珠玉  
土居十萬戶水居三千戶九域志載男女不耕桑貨賣

用雜物以代錢常氏馬鳴山志稱其持金易絲枲者不絕於道矣

唐詩紀事元稹受通之初有習通者曰地勢濕卑編人士希少邑無吏市無貨百姓茹草木刺史以下計粒而食大有虎豹蛇虺之患小有蝮蚋蜘蛛之類皆能鑽嚙肌膚使人瘡痂夏多陰靈秋為痢瘡故其酌白樂天詩茅苫屋舍竹籬州虎怕偏蹄蛇兩頭暗蠱有時迷酒飲浮塵終日似波流沙含水弩多傷骨田仰畬刀少用牛

知得共君相見否近來魂夢轉悠悠微之以詞人謫居  
牢騷之感或甚其詞者與

大寧監圖經云一泉之利足以奔走四方吳蜀之貨盛  
萃於此監地接胸臆多瘴土人以茱萸嚙茶飲之可辟  
嵐氣以其味辛名曰辣茶題名記大寧僻在東南軒冕  
者寡而封畛之內皆樂善之編氓也

夫竹枝者閭閻之細響風俗之大端也四方莫盛於蜀  
蜀尤盛於夔杜子美白帝詩云破甑蒸山麥長歌唱竹

枝萬州圖經云正月七日鄉市士女渡江南蛾眉磧上  
作鷄子卜擊小鼓唱竹枝歌開州志云俗重田神男女  
皆唱竹枝巫山志云琵琶峯下女子皆善吹笛嫁時羣  
女子治具吹笛唱竹枝詞送之則夔俗比比如是矣老  
杜夔州歌八絕句即所稱遲回問風俗涕泗閔興衰也  
詩云中巴之東巴東山江水開闢流其間白帝高為三  
峽鎮夔州險過百牢關白帝夔州各異城蜀江楚峽混  
殊名英雄割據非天意霸主并吞在物情赤甲白鹽俱

刺天間閭繚繞接山巔楓林橘樹丹青合複道重樓錦  
繡懸灤東灤西一萬家江北江南春冬花背飛鶴子遺  
瓊藥相趁鳬雛入蔣芽東屯稻畦一百頃北有澗水通  
青苗晴浴狎鷗分處處雨隨神女下朝朝蜀麻吳鹽自  
古通萬斛之舟行若風長年三老長歌裏白晝攤錢高  
浪中閭風玄圃與蓬壺中有高唐天下無借問夔州壓  
何處峽門江腹擁城隅武侯祠堂不可忘中有松柏參  
天長干戈滿地客愁破雲日如火炎天涼劉禹錫竹枝

詞九首序云四方之歌異音而同樂歲正月余見建平里中兒聯歌竹枝吹短笛擊鼓以赴節歌者揚袂睢舞以曲多為賢聆其音中黃鐘之羽卒章激訐如吳聲雖傖獠不可分而含思宛轉有淇澳之豔昔屈原居沅湘間其民迎神詞多鄙陋乃為作九歌到於今荆楚歌舞之故余亦作竹枝九篇俾善歌者颺之附於末俾後之聽巴歛者知變風之自焉其詩云白帝城頭春草生白鹽山下蜀江清南人上來歌一曲北人陌上動鄉情山

桃紅花滿上頭蜀江春水拍山流花紅易衰似郎意水  
流無限似儂愁江上朱樓新雨晴灤西春水縠紋生橋  
東橋西好楊柳人來人去唱歌行日出三竿春霧消江  
頭蜀客駐蘭橈憑寄狂夫書一紙住在成都萬里橋兩  
岫山花似雪開家家春酒滿銀杯昭君坊中多女伴永  
安宮外踏青來城西門前濫湏堆年年波浪不能摧懊  
恨人心不如古少時東去復西來瞿唐嘈嘈十二灘人  
言道路古來難長恨人心不如水等閒平地起波瀾巫

疎蒼蒼烟雨時清猿啼在最高枝箇裏愁人腸自斷由  
來不是此聲悲山上層層桃李花雲間煙火是人家銀  
釧金釵看負水長刀短笠去燒畬蘇子由竹枝詞云舟  
行千里不至楚忽聞竹枝皆楚語楚言啁哳安可分江  
中明月多風露扁舟日落駐平沙茅屋竹籬三四家連  
春竝汲各無語齊唱竹枝如有嗟可憐楚人足悲訴歲  
樂年豐爾何苦釣魚長江江水深耕田種麥畏狼虎俚  
人風俗非中原處子不嫁如等閒雙鬟垂頂髮已白負



水採薪長苦艱上山採薪多荆棘負水入溪波浪黑天  
寒斫木手如龜水重還家足無力山深瘴暖霜露乾夜  
長無衣猶苦寒平生有似麋與鹿一旦白髮已百年江  
上乘舟何處客列肆喧嘩占平磧遠來忽去不記州罷  
市歸船不相識去家千里未能歸忽聽長歌皆慘悽空  
船獨宿無與語月滿長江歸路迷路迷鄉思渺何極長  
怨歌聲苦淒急不知歌者樂與悲遠客乍聞皆掩泣予  
以萬厯士子歲再過夔門亦作竹枝詞九首詠之聊以

見今昔之感而行路之難也詩云相公衆眼小於錢門  
外江流在眼前青鞵素足朝行汲來往人看似水仙早  
看東南暮看西蜀天只怕上頭低東邊日出純無用雲  
暗上頭三尺泥赤甲白鹽高刺天東屯相接草堂邊杜  
陵老叟是何物口裏吟詩來課田君居北井妾南沱對  
面相看隔路多須趁漁舟過急峽還隨鳥翼上斜坡丞  
相行師說有神陣圖開處畫圖新新歲踏青來磧上誰  
家潔白勝於人刺花黃白鬪妖嬌香氣聞過七里饒刺

似儂針花似錦鬢邊樣作手中挑吳船越舫富錢財鍊  
鎖橫江擅不開販鹽惡少截闖去不識瞿塘灩澦堆今  
日峰高雲束腰平平一掌是明朝朝來出門又如是儂  
是好言郎莫焦君莫畏途途不危世途回首一看時人  
心屈曲如胸臆瘴氣衝人人不知

已上夔州

遵義圖經云其俗敦龐淳固以耕植為業鮮相侵犯天  
資忠順悲慕華風

元史地理志云夷夏雜處遵文教守禮法夷椎髻披氊以射獵伐山為業信巫鬼好詛盟

方輿勝覽云累世為婚姻以銅器氊刀弩矢為禮燕樂以鑼鼓橫笛歌舞為樂會聚貴漢服出入負刀弩交易與華人不侵此亦屬縣之大較也

蜀郡守李冰去其地殊遠闔郡嚴祀之以六月二十四日誕唐經畧安撫趙延之按部終於壁山亦遙祀焉以七月十二日誕真安州俗以元宵為年禮天神下享歲

飯尚與華別

已上遵義

岑參招北客文其東則大江沄沄下絕地垠百谷相吞  
出於荆門突怒吼劃附於太白澎湃礪礪會於滄溟跳  
噴浩淼上濺飛鳥蹙縮盤渦下漩黿鼉三峽兩壁亂峰  
如戟槎枒屹崿瀕洞劃折高千天霓雲外水積盡日無  
光其下黑窄瞿塘無底淺處萬尺啼猿哀哀腸斷過客  
復有千歲老蛟能變其身好飲人血化為婦人衒服靚

粧遊於水濱五月之間白帝之下洪濤塞峽不見灩澦  
翻天撼地震吼雷怒亦有行舟突然而去人未及顧棹  
未及舉瞥見陽臺不辨雲雨千里一歇日未亭午須臾  
之間黑風暴起拔樹震山石走沙飛波騰浪翻舟子失  
據摧檣折竿漩入九泉沒而不還支體糜散蕩入石間  
水族呀呀撥刺爭食蜀之東兮不可以往北客歸去來  
兮

蜀中廣記卷五十七

欽定四庫全書

蜀中廣卷五十八

明 曹學佺 撰

風俗記第四

川北道屬

應劭風俗通云閬中有渝水實民多居水左右天性勁  
勇初為漢前鋒陷陣銳氣喜舞帝善之曰此武王伐紂  
之歌也乃令樂人習學之今所謂巴渝舞也隋書地里

志稱其風俗與漢中不別質朴無文不甚趨利雖蓬室  
柴門食必魚肉好祀鬼神尤多忌諱家人有死輒離其  
故宅崇重道教猶有張魯之風焉每至五月十五日必  
以酒食相饋賓旅聚會有甚於三元時按蒼溪志北八  
十里有岐平鎮每五月初間四方商賈輻輳貿易以萬  
計號為岐平會亦古今相沿之槩也

宋太守李獻卿南樓詩序云地暖氣清民淳事簡馮忠  
恕記云其地平行而沃其民恭儉而文在西南為佳郡



不減成都唐薛能詩蜀音連井絡秦分隔褒斜陸游詩  
遨樂無時冠巴蜀語音漸正近咸秦

閬中人以譙君黃為土主元陳友慶祠記云侯墓在縣  
北十里譙壩廟在街東邦人旱澇災疾禱之隨應宋嘉  
熙間封寧福忠祐侯賜靈惠額

杜甫南池詩崢嶸巴閬間所向盡山谷安知有蒼池萬  
頃浸坤軸呀然閬城南枕帶巴江腹清源多衆魚遠岼  
富喬木南有漢王祠終朝走巫祝歌舞散靈衣荒哉舊

風俗

滕王亭子詩云君王臺榭枕巴山萬丈丹梯尚可攀春  
日鶯啼修竹裏仙家犬吠白雲間清江碧石傷心麗嫩  
藥濃花滿目斑人到於今歌出牧來遊此地不知還已  
上俱為邦人遊集之所

利州圖經呼為小益對成都為大益也舊志云自城以  
南純帶巴音由城以北襍以秦語唐歐陽詹集貞元中  
吳興沈公長源牧利州其為政五年予旅遊乎利觀人

安俗阜思所以美之作益昌行詩云驅馬至益昌倍驚  
風俗和耕夫壟上謠負者途中歌處處川復原重重山  
與河人煙遍餘田時稼無閒坡問業一何修太守德化  
加問身一何安太守恩懷多

漢李充蜀記蜀山自綿谷葭萌道徑險窄北來擔負者  
不容易肩謂之左擔道故少陵愁坐詩云葭萌氏種迥  
左擔犬羊存

晉張載劔閣銘惟蜀之門作固作鎮世濁則逆時清斯

順唐歐陽詹棧道銘云秦之與蜀也人一其性物同所  
宜嗜欲無餘門教化無餘源可貿遷可親昵擘坼地脉  
睽離物理豈造化之意乎

華陽國志云梓潼縣有善板祠一曰惡子民歲上雷杼  
十枚歲盡不復見云雷取去按即今梓潼帝君也誦讀  
家奉祀之

鄭谷梓潼歲暮詩江城無宿雪風物易為春酒美銷磨  
日梅香寂寞人

巴州振文堂記惟茲巴土實壁集二州之地風俗安於  
簡儉樂於歌舞本州志有僧問演和尚曰如何謂之巴  
州荅云灰界勾絲地雲垂挿繭天薛能嘉陵驛詩電涼  
隨雨氣江熱傍雲根蠶月繰絲路農時碌碡村觀察使  
定原呂顥先蠶祠詩花繡冰紈寸寸絲箇中消息幾人  
知掇桑試語巴江女好熟名香報爾師

宋彭永上元詩云巴人最重上元時老稚相携看點詩  
行樂歸來天向曉道旁聞得喚蠶絲注云巴俗元宵三

夜兒童皆唱巴音徹曉謂之喚蠶絲然其俗又以三月三日晴雨為蠶先兆諺云三月三日晴樹上掛金瓶言是歲蠶熟也保寧一府四月新絲出輸縣官緡過此則逋負矣俗因謂之蠶糧予按陳宗虞城門歌效閭人機杼聲也一解云城門開羣胥夜來徑赴我機取我緡我言織未成羣我憎二解云夜未央彼胥者胡強掠我織裂我裳疑爾盜也則執牒亦有章嗟胥須臾壺漿來壺漿來三解云嗟胥爾嗔緡實難寧其身而繫以赴爺

其忤既楚以贖誰爾數驚爾妻孥爾寧輸四解云我有  
役有租繒非我輸嗟爾絲天產我崇我身則寒繒寧我  
被毋樹桑貽我殃嗟貽我殃蓋深以蠶為累也是在司  
土者不擾之耳

已上保寧

華陽國志云宕渠郡先漢以來士女賢貞縣人車騎將  
軍馮緄大司農玄賀大鴻臚龐雄桂陽太守李溫等皆  
建功立事有補於世緄溫各葬所在常以三月二子之

靈還鄉里水暴漲縣吏民莫不於水上祭之

順慶圖經云每歲二月二日郡人隨太守出郊謂之迎富邵博果州詩云從昔遨遊盛兩川充城人物自駢闐萬家燈火春風陌十里綺羅明月天郡志自邵伯溫守此邦名山勝景題品無遺至以小成都目之宋郡守楊濟開漢樓記自號小益不復數潼遂也

魏了翁安少保丙祠堂記云初公未仕時常遊學於果州習其土風與其州之人士每過其州眷焉弗忍去及



是被命再鎮滅賊還報適在是州州人滋不忘於是肖公像祠焉

果之先有瓦棺葬者偶牧童於插旂山掘地見小孔其內深廣各數丈內有瓦棺萬餘以告太守乃令瘞之此近時事也

臣白居易教授吳諱蓬州刺史王計萊州刺史制云勅吳諱等咸以材略載筆從戎藝學智謀濡然足用多厯年紀備嘗艱危進退周旋不聞失道司徒弘正詳奏以

卷五十八  
聞因以竹符分命試吏而蓬萊二郡各介一方牧人者  
但不擾其心不奪其力則雖華夷南北土物不同皆可  
以自足自遂矣宜用此道往安養之

蓬州志云城南開元寺有五如來殿為一郡之最元宵  
燈火最盛山谷之民畢出太守為華嚴會以領略遊人  
者五日號為蠶叢之勝蠶事自三月起至九月乃止謂  
之九熟蠶

宋廣安志近世以來儒風尤勝人物間出不減果遂方

輿勝覽云世謂廣安有十似紙似池席似蘇梨似耿魚  
似嘉猶之可也他未必然若所謂金羹玉飯紅腊紫梨  
則非溢美矣憲使何志熙詩欲說賓城好先誇萬物妍  
金羹收稻後紅腊落梅前照座梨偏紫堆槃荔更鮮雪  
藤尤異產應不數花牋

已上順慶

十道記云廣漢之地有鹽井銅山之富蔬食果實之饒  
此後漢馮灝刺奢之說所由作也玉堂遺範授高璩劔

南東川節度使制云梓潼與區賢彥徊翔者矣舊經稱其俗好勝尚氣不恥貧賤士通經學古罕為異習豈非相沿以使之然與

文獻通考載石慶緒有梓潼風俗譜甚備予觀柳仲郢杜濟之勅一則云在訓師旅以恢武經厚風俗以闡文教一則云有被山帶江之險藉安人禦侮之能蓋重之也王維送梓州李使君詩萬壑樹參天鄉音聽杜鵑山中一夜雨樹杪百重泉漢女輸幢布巴人訟芋田文翁

翻教授不敢倚先賢亦因晉末李雄夷獠之亂文教有待而興起者乎

潼川志云唐末天下貨藥者皆於九月初集梓州王杞龍冲地貨其所齎藥八日夜始散俗因謂之藥市及宋燕肅知郡事又增三日至十一日而罷按夷堅志王杞字昌遇大中十三年九月九日舉家仙去郡人即其處祠之

杜甫詩云五載客蜀郡一年居梓州時游於鹽亭通泉

之間其次鹽亭詩云馬首見鹽亭高山擁縣青雲谿花  
淡淡春郭水泠泠全蜀多名士嚴家有德星登臨意無  
限好為老夫聽其次通泉詩云溪行衣自濕亭午氣始  
散冬溫蚊蚋集人遠鳬鴨亂驛樓衰柳側縣郭輕烟畔  
一川何綺麗盡日窮壯觀亦俱曲盡其致 陸務觀云  
射洪陸使君廟俗以少陵詩為籤往往有驗予遣僧則  
華求籤得遣興詠龐德公詩顧迫貧從仕又十有二年  
負神之教多矣

華陽國志德陽縣有青石祠山原肥沃有澤漁之利士女貞孝望山樂水土地易為生事車騎將軍鄧芝雅有終焉之思後遂葬其山即今遂寧縣是刺史李繁制云遂居蜀腹馬咸記云人物富繁江山灑落也

楊炯遂州長江縣先聖孔子碑鄉閭少事風月多懷命童子於雲臺就門人於相圃冬禮春詩之化再造雙川淹中稷下之風一匡二蜀蓋文學彬彬盛矣

魏了翁題普慈率錢建貢院疏普於東蜀為士大夫郡

而公私財力反出諸郡下繕營之費亡所從出是以建  
一門閭遂致斂民而給用幾以啓訟其工役之不可輕  
議蓋若此文同樂間堂記中江為梓之三萬戶縣生齒  
既衆分地既陋其爭鬪之辯侵越之訴番已遽作紛午  
交衍鞭之庭而械之獄者亡虛日所決一未厭其願則  
號冤唱屈奔走跳盪於勸農使前者絕復續焉士大夫  
以無可奈何而適為之令者何嘗不望名而起畏河南  
廖君自福昌移治於此聞其所以為政之大抵也無急



擊無緩縱棼以櫛之結以觶之摩撫柔愿規厲陶突善  
端姦幾觀聽而盡民自戒告無敢欺瀆曾未逾歲已底  
無事云

已上潼川

岑參招北客文云其北則有劔山巉巉天鑿之門二壁  
豁舒高嵯嶙峍上柱南斗榜鎮於坤下有長道北達於  
秦秦地神州中有聖人左右伊臯能致我君雙闕峨峨  
上覆慶雲千官鏘鏘朝於紫宸玉樓鳳凰金殿麒麟布

德垂澤搜賢修文皇化欣欣煦然如春蜀之北兮可以  
往北客歸去來兮

總錄

顏之推曰吾在益州與數人同坐初晴日明見地上小  
光問此是何物有一蜀豎就視荅云是豆逼耳相顧愕  
然命取將來乃一小豆也窮訪蜀土呼粒為逼時莫之  
解吾云三蒼說文此字白下呼為匕皆訓粒通俗文音  
及反

鷄肋編云蜀人諱雲以其近風也

李膺益州記云蜀人謂嶺為棟

子虛賦行乎洲淤之浦郭璞註曰淤亦洲名蜀人云亦見方言

蜀人呼平川為埧字從貝非從具呼水洲曰槃俱見韻寶

蜀江自成都至荆門名灘險地舟人一一數之不能悉記聊書其總名淺而急流曰灘水流沙上曰瀨水出尾

下曰瀼水疾崖傾曰礪水漫石流曰沱石積水淺曰漬  
灘漬相湊曰泝水如穀轉曰漕見益部談資

鼻始也罍之初生謂之鼻人之初生謂之首梁益之間  
謂鼻為初或謂之祖祖居也出方言

蜀人謂母曰姐又曰西蜀呼人叟叟是頑愚之稱出韻  
會蜀人稱尊者為波祖及外祖皆曰波出吳船錄

蜀人親愛之辭曰么以小兒女為么又愛其子曰犬子  
司馬相如字犬子又以婿為門客

續博物志蜀人以痲瘡為奴婢瘡

巴濮之人自呼曰阿陽陽之言我也爾雅引魯詩有美  
一人陽如之何言我奈之何也子兮子兮如此良人何  
亦此意出丹鉛錄

尋長也梁益之間凡物長謂之尋

跂格登也梁益之間曰格或曰跂

抵倣會也雍梁之間曰抵凡會物謂之倣

跂奇也梁楚之間凡全物而體不具謂之跂雍梁之郊

凡詈文體不具者謂之跼已上俱方言

揚雄謂目瞳子曰清盧揚眉曰揚衡出魯公類說

益州謂瞋目曰瞋說文瞋目多精也益梁之間謂聾為  
眸俱出韻會

梁益之間凡言人盛及其所愛諱其肥謂之臞出方言  
又呼某事某物必重一字如訓小兒然

蜀人擊拂以初入為孟入有徐延璜者王衍舅也其作  
私第華侈衍常幸之瀕去於壁上戲題孟字蓋蜀中以

孟為不佳故也他日孟知祥到蓋先兆云出外史檣杭  
老學菴筆記蜀人見物之可誇者則曰嗚呼可鄙者則  
曰噫嘻宋景文云李白蜀道難曰噫嘻蜀人發語辭也  
高僧傳云蜀人以太甚為太力

譎權詐也梁益曰謬出韻會

格陞也梁益之間曰格出爾雅

肖類法也西楚梁益之間凡言相類者則謂之肖肖者  
似也

懊惡慙也梁益之間言心內慙矣

私纖小也梁益之間凡物小者謂之私小或曰纖繒帛之細者謂之纖已上俱方言

成都一槩呼求事官人為乞措大按王氏見聞錄成都有丐者詐稱落泊衣服藍縷常巡市廛見人即展手希一文云失墜文書求官不遂人皆哀之為其言語悲嘶形容顛顛故也居昇僊橋側後有勢家於所居傍起林亭欲廣其池館遂強買之及闢其圭竇則兩間大屋皆



貯散錢滿計數十萬鄰里莫知

魏畧云新城孟太守道蜀猪豚雞鶩味皆淡故蜀人作食喜煮飴蜜以助味

蜀人二月好以豉雜黃牛肉為甲乙膏非尊親厚知不得而預其家小兒三年一享

杜甫在蜀日以七金買黃兒米半籃細子魚一串籠桶衫柿油巾皆蜀人奉養之粗者俱雲仙雜記

蔽膝西南蜀漢謂之曲領或謂之襦褌出方言

蜀山谷間民皆冠帛言為諸葛孔明孝服所居深遠者  
後遂不除出乙卯避暑錄今蜀人謂之戴天孝


屣履麤履也西南梁益之間或謂之屣或謂之屣履其  
通語也出方言

爾雅不律謂之筆注云蜀人呼筆為不律也語之變轉  
俎几也西南蜀漢之郊曰杜出方言

蜀人言撮曰契讀如涅周禮註曰無契而固出韻寶

蜀人謂糊窻為泥窻花藥夫人宮詞云紅錦泥窻遶四

廓非曾遊蜀亦所不解出老學菴筆記



蜀中廣記卷五十八